

四庫全書

集部

欽定四庫全書

少室山房集卷二十八

明 胡應麟 撰

七言古詩十五首

宋榻蘭亭趙文敏臨本真蹟歌

永和九年歲癸丑典午衣冠盡南走臨池崛起王右軍
萬古乾坤落書藪江東勝槩標蘭亭軒窗亂疊羣山青
流觴曲水修禊事一樽隨意酣沉冥道服逍遙坐亭子

認是當年會稽史尋山玩水不解愁屢向人前誇樂死
含毫是日如有神飛天歷歷來仙真崢嶸隻字啟八法
快劒長戟劇星辰諸賢詞翰盡壓倒興公虵足徒夭矯
垂頭大令甘罰觥奕葉瑯琊傳至寶雲初智永歷辨才
屋梁伏檻叢蒿萊文王百計命蕭翼逡巡玉匣沉泉臺
餘子紛紛競摹勒掌指烟煤半狼藉率更葉几撫硬黃
來世爭傳定武石勝朝妙蹟仍浮屠北禪老僧秘若無
吳興轉乞獨孤本十三跋語題長途窮年兩腕追步伐

北牡驪黃較絲髮雙雕比翼翔太空勢極扶搖貫閭闔
此弓舊榻真宋前五字未損湍流天奚潘墨潘儼如漆
澄心素札鋪純綿竭來燕市暴敝篋瞥見寰中眼雙熱
傾囊購得置案頭不減西方貝多葉龍盤鳳翥何紛披
三百餘字字字飛乾坤萬古但一帖含毫落筆皆天機
吳興臨本推冢嫡中郎虎賁貌如壹誰哉帖尾聯王羊
展卷狂呼勝和璧古今二絕偕遭逢茆齋氣色干長虹
將無一夕雷電入六丁下索還鴻濛沉吟却憶永和世

舉代清談誤真際虛聞一統儷漢唐大業三途驟凌替
猶餘八法懸高旻墨池滉漾雄千春漢文唐律遂鼎峙
至今免誚秦無人腐儒往往嗤小技賢刼疇令重晉氏
歐虞薛褚匪上乘吳興入室世無異一觴一咏樂奈何
醉來故帖重摩挲恍入山陰坐修竹拍浮流水觀群鷺

王元琳伯遠帖真蹟歌

自從兵入宣和殿晉人真蹟世罕見二王之外尤無聞
胡乃此帖傳王珣四十二字鬪奇絕字字精芒射天闕

蕭疎逸宕轉姿態牝牡驪黃半明滅當年宣武稱黑頭
誰其大筆東亭侯至今江左僅茲帖如椽恍忽存風流
錦錦伯遠隸書譜妙蹟宣和曠今古右軍大令俱塵埃
靈光一柱猶蒿萊九百餘年秘雲笈暗中神鬼互呵斥
何論寶玉與大弓茅齋白日飛長虹

顏魯公祭姪草歌有序

吳興跋袂帖謂右軍書蘭亭是已退筆因其
勢而用之無不如志茲其所以神也今蘭亭

不可見矣魯公祭李明文其筆鋒退盡者披
攬真蹟吳興數語宛然若為茲帖傳神惜當
時困學齋中何以不令一覩也

漁陽播亂飛黃塵旄頭月黑纏妖氛常清血戰棄全陝
二十四郡虛無人平原魯公眦雙裂一麾猛氣雄三軍
疾呼河北倡忠義普天率土知君臣帝心未滅安史禍
杲卿碎舌投天津巢傾卵覆季明死舉宗三百遭坑焚
烏鳶飽食螻蟻妬毒痛四海同酸辛魯公惋憤掩茵骼

哭兄哭姪噓愁雲生平正氣塞宇宙淋漓一帖猶千春
乾元元年歲戊戌昊蒼有意開斯文摘章吮筆筆欲舞
墨池一派流天真肝腸寸寸委波磔縱橫跼跋超羣倫
長風巨浪鼓溟渤泰山喬嶽盤嶙峋天矯虬龍赴幽壑
繽紛鸞鵠翔高旻十行道婉尚含怒五行淳鬱逾生嗔
卒章沉痛徹心髓恍疑汲塚窺三墳如椽一掃二百六
一言一字皆千鈞卽令塗抹迥姿態西施傾國加雙顰
當時魯公豈匠意精誠烈烈懸風斤相傳一草歷元宋

太空磊落垂星辰二陳跋語差可玩文家待詔彌津津
鮮于困學傳累世即今妙蹟來江濱凌晨攬誦豎毛髮
齋頭什襲藏家珍君臣大義貫星日矧茲八法尤通神
作歌鄭重寄仰止墨林萬古颺清芬

米南宮誤恩帖歌

張顛老死米顛出好手中原鬪狂逸南唐寶石作研山
三十六峰舞寒碧低頭拜石石不語袍笏蹣跚笑兒女
一朝把換薛公鶴泣向蟾蜍泪如雨興來刷筆掃孤憤

十萬材官破堅陣，青城俠客揮劒鋒。夜叉飛天雲霧中，
宣尼常笑由也嘖。顛也淋漓逞豪健，此帖數字亦怒張。
兒駒泛駕不可當，五百年來米顛子。絕倒當年顛長史，
鍾王節制安事此。宋人送南宮有名滿天下之稱，或疑
米不足當者曰：二十年來何處不省

有米顛
子耶

題李龍眠二十七祖圖歌

丹青國手吳道玄，眼空萬古當開元。沿流晚季六法盡，
中興十指傳龍眠。何人攜此寫佛祖，遍羅列馬鳴衆大。

士歷歷具顛末袈裟挂膝右肩袒妙相人天儼對越二
十七祖僅九幀十八應真徒耳聞云是吳儂利厚值輿
圖剖析成三分朱門貴戚萬與柳幕置齋頭數各九蘭
陰措大拚鼎足盡典商彝鬻漢白瓦棺寺壁畫久亡僧
絲衛陸俱渺茫荆關遞得山水趣誰持大筆描空王參
差絹素裂強半魚口橫紋欲糜爛人言畫理出唐世遠
即楞伽近靄瓘即今宋代寧庸工龍眠繪事真人龍諸
天帝釋尤冠絕青獅白象行虛空阿難陀下九尊宿一

一披圖認睂目或眠樹底修四禪或坐林中斷五欲或
拈聖果菴沒羅或把靈花給孤獨或看澗壑浮清蓮或
聽岩巒墜飛瀑或從長爪證緣覺或遇獐牙驗調伏或
開甘露廣法門了了根源繪身毒憶昔李侯盤礴時胸
中壯氣橫須彌大千世界攝毫翰狂墨亂洒天迷離遂
巡群祖真相出虎頭金粟爭神竒惜哉賈豎巧壘斷吉
光片羽猶分持復憶龍眠好畫馬筆力曹韓較多寡
驪黃注想馬胎入足墮泥犁若飄瓦以茲懺悔寫佛門

丹青熒熒留乾坤香燈高閣互供養天龍八部如雲屯
乃知古德真善誨隻語單詞係成毀祇今名蹟六百年
夜夜光芒護神鬼二十七宗瞥眼過東土祖師來達摩
面壁形模竟何以寰中試見龍眠李

題趙千里真逸圖歌

吳郎示我真逸圖生綃半幅雲霧裂高堂挂之夏六月
颼颼寒風墮林葉縱橫亂瀑墜高崦千峰萬峰路明滅
峰回路轉天欲盡似有孤亭架木末其下巨石盤長松

楓丹粟黃秋事濃
松間講易三兩翁
秦時四皓鬚眉同
一翁擊阮一坐嘯
其一恍似東園公
斟酌茲圖定誰筆
神品錦錦世無匹
細看樹石用勾法
人道王維字摩詰
或言近出趙千里
往往抽毫弄金碧
嗚呼王趙不可作
縱復天工緊誰識
須臾暝色來朱欄
耳邊滴滴來飛泉
吾將追逐黃與綺
坐占孤亭號用里

題李唐雪山遊騎圖歌

陰崖凍雪靈亂石
誰其畫者李唐筆
萬仞寒山挂翠嶺

恍見當時大斧劈何人布裘裹竹笠款段婆娑入高壁
後有蒼頭挈雙屐太華路南望咫尺欲陟其巔叩拘翼
帝座呆思儼呼吸十二瓊樓衆仙集鶴氅繽紛互長揖
白晝乘風繞八極我欲從之路昏黑未滿丹臺謫來籍
策蹇言歸故井邑灞陵橋頭句堪覓

題趙承旨野岸呼舟圖歌

高堂飛瀑十丈寒青山四面浮朱欄繞砌霜楓墜紅葉
恍忽城居在林樾吳興畫手真傑特人巧天工擅開闢

細看此水與此石非畫五日即十日紫衣抱膝坐渡頭
蒼頭弛擔遙呼舟清溪萬頃隔孤棹隔崦人家落斜照
山深樹黑逕險崎石床天畔雲迷離歸樵谷口冉冉入
似有柴門挂蒼壁標題軸尾了可尋集賢學士孟頫臨
今古今人嘆三絕惜哉二字遭鼠齧

承旨名爲
鼠齧幾半

題黃公望西泠烟靄圖歌

大痴老人黃子久塗抹丹青號名手名呼大痴畫不痴
此圖氣韵尤淋漓危峯突起矗霄漢迤邐橫岡折層巘

其下澄湖八萬頃金碧樓臺挂天半芙蓉及菡萏艷色
何紛披恍如若耶溪並浴千西施飛鷗明滅傍沙際挾
雌抱子羣翔飛第六橋南入靈隱此去南屏尚多景岳
王墓倚金沙灘竺色三天浮髻鬟隔崦人家夕陽落破
帽騎驢出東郭尋詩何處攜絲桐美人遲我飛來峰

題黃監柳塘禽鳥圖歌

五朝畫筆推黃荃徐熙之後昌友前禽魚花鳥落掌指
即今繪事仍流傳十畝方塘浸寒碧高柳繁陰弄斜日

夾堤荷葉青連錢翠蓋亭亭萬粒出蒹葭藻荇翻縞帶
隱映清波漾盤石沙頭浴鷺拳八九石上雙鷗儼相識
魚蝦潑刺明鏡中迫視渾疑手可拾黃鸝紫燕語深樹
點綴精神著顏色臨池誰喚王右軍池頭一白俱鷺羣
大鷺仰吭鳴向人小鷺數十何紛紛天時淑風清氣媚
野鷺家雞各求配一雄前引衆雌後宿食飛鳴宛成隊
嗟嗟荃也得妙理意匠經營入無始揮毫衆羽倏生動
造化真機在十指爾時徐熙亦化工兩賢相阨悲途窮

祇今無論黃監手雜埒趙

闕

少室山房集卷二十八

欽定四庫全書

少室山房集卷二十九

明 胡應麟 撰

七言古詩五首

雙劍篇 有序

少保定遠戚公得精鐵百鍊為二劍一贈少
司馬汪公一以自珮每相遇則專設一榻陳
之示延津之合馬是秋應麟謁汪公於武林

適戚公自燕來會于是二劔復合司馬公出
示坐中精彩射人毛髮洞鑒真神物也公命
作歌輒成一章以紀其事

君不見新都司馬公手提三尺驅羣雄文章落筆掩左
馬出將入相稱人龍又不見山東戚少保結髮從軍事
征討高牙大纛海岱間南北王庭淨如掃兩公文武真
奇才中原相遇神徘徊片言握手肝膽合白日莽蒼青
冥開帝遣將軍獲精鐵鑄作純鉤兩奇絕一攜自珮一

贈公繞夜虹光對明滅相逢則合離則分雄飛雌逐流
風霆合如雙龍挂宇宙離如獨鶚橫秋冥何來胡生客
武林躡兩芒屨登龍門長揖將軍拜司馬瞥然覩此驚
心魂蜃飾蛟裝迥竒麗土花半蝕芙蓉膩三秋太白橫
亘天萬丈銀河寒壓地飛霜噴雪颺颺愁掣電揚颺神
鬼避武林八月天茫茫白波兩岸飛錢塘天目東西八
萬仞勢壓大海摩青蒼此時雙劍坐中合神鋒咫尺相
低昂縱橫壯氣攝五岳浩蕩精魄迴三光將軍百戰挺

奇節司馬百代留餘芳丈夫樹立固當爾那令異物長
潛藏君不見蒙莊周平生說劍干諸侯窮來斗水不自
覓咄嗟文士真蜉蝣又不見淮陰侯仗劍從戎追沐猴
武士知幾古來少未央落日風颼颼豈若公遭明盛世
文武雄才更相濟壯烈同標天地間淳風直挽周秦際
東海胡生不自量蚤年俠氣飄魚腸長纓欲係玉門敵
寸管擬軼開元章只今三十尚碌碌爾髮胡短心胡長
嗚呼兩鉅公絕代真罕有干將與莫邪世世長共守靈

物由來異人得青萍詎落凡夫手笑殺狂生一蒯緱歌
罷無魚厭奔走謂生且飲勿復言天生七尺寧徒然劇
孟曾傾亞父坐侯芭亦受揚雄玄名山石室豈遼絕會
令大業流青編胡不為公一掃五千字珠光照耀雙龍
泉渴病年來廢書久茂苑西風重搔首寂寞公孫劍器
行一代雄才我何有覩公神物心飛揚醉墨淋漓忌奸
醜篇成一笑還自歌錯落寒空墮牛斗倘勒豐城雙玉
玉萬古雷張同不朽

蚤春苦雨邦相明府見過留飲齋中竟夕走筆

放歌為令雨行并懷燕社諸子

曩嘗與惟敬
惟寅子大裕

卿文父汝修集思伯
館有中秋雨集卷

白龍夜挂錢塘渚兩岼嵯峨雪山起狂風忽捲大海流
散作東南萬家雨蘭陰一雨俄經旬茅齋獨卧愁晨昏
剝啄何人駐高蓋傳呼喻侯來扣門喻侯意氣天下無
結交平生盡酒徒五載空淹茂陵秩一官再問長安途
憶乍停車澌江溪邂逅逢余誓生死片語平將白雪投

雄心真向青冥吐汝自分符出建章余亦攜書上帝鄉
掉頭不入金華殿却憶山中尋石羊風塵道路巧相值
宛轉蘭陰舊相識把臂寧論白壁雙酬知頓擲黃金百
人間彩筆何紛紜相看吾汝真忘形乍可經年對叔度
那能一飲無公榮蚤春人日差可賞塵尾玄言豁塵袂
輕雲忽妬上元節窮陰驟入花朝想衡門獨掩空莓苔
白眼四望青天摧飛鳧忽報故人至拂衣大笑愁顏開
曲逕迴軒迥幽寂面面雕闌護奇石珠簾十二清晝垂

一塵不到胡生宅博山爐中沉水香蘭陵之酒雙玉缸
蒲團對酌春茫茫居然一息破萬古那知雨色來虛堂
漆園無人左遷沒屈宋曹劉俱寂寂十言欲起杜陵歌
四部重翻弇州集人生瞬息同埃塵碌碌誰憐身後名
日月空懸古今照宇宙不補東南傾何如雄飲呼大白
百川一吸飛長鯨七首縱橫雪花亂唾壺錯落浮雲驚
酒間起舞真態出元氣淋漓袖雙濕輕薄何由嗔襴衡
磊塊政須澆阮籍高山流水盡知己授簡含毫仍促席

沉冥不辭真宰怒跌蕩猶堪鬼神泣紫氣豐城暝不流
寒芒嫠女紛相射回首華陽夙昔交十年俠氣摩蒼霄
黎子歸耕大庾側梁生草沒羅浮坳劉侯李侯差振翩
朱生但乞夷門食康胡咫尺招不得眼底何人寄肝膈
吁嗟吾汝自一時越吟楚調俱稱奇飛揚總讓少年貴
嗟惜從教行路疑鄴侯滿架差足樂長孺淮陽豈云薄
種秫聊耕彭澤田草玄絕勝揚雄閣喻明府歌莫悲汝
是豫章一男子余亦俛首低眉世間士浮榮一代安

所希大業千秋竟誰竦丈夫會合自有神肯將鸞翮隨
鷄羣孫陽造父一朝值駮駟驊騮雙絕塵歌莫悲喻明
府我欲乘雲歸太清汝但為霖佐真主異日中原共鞭
弭肝腸一寸久相許漏盡銀虬雨聲歇蕭颺如聞二龍
語為君作歌聊爾女無論筆落驚風雨

折檻行送沈純父北上

有序

余以孟冬過樵李訪純父適純父將應召北上
謂余賦一長歌為贈援筆慷慨得六百字為折

檻行純父謫戍四載直聲動天下故自千秋丈
夫而余與純父誼托久要志存大業即世俗期
望非所宜道故歌辭莽莽直吐胸臆知純父不
鄙余言兼柬同時趙吳艾鄒四君子

北風動地捲霜雪沈子嚴裝候明發白馬銀鞍走燕市
天子召見黃金闕憶昔丁丑年中事嗚呼已往難陳說
網常萬古忽如綫沈子旁觀臂雙裂三年忍蔑父母愛
七尺自與妻兒訣飛書一夜上明主百辟蒼皇膽俱懾

宮闈動色問忠悃
乞得殘軀傍南粵
茫茫大海天欲盡
野魅山魃共生活
銅柱頻更伏波戍
鐵衣亂洒羈臣血
枕柳葉底托餘蔭
豈蕊枝前賦鵲鳩
鬚毛五載凋欲盡
意氣千鈞莽難折
離騷熟讀引斗酒
怒擊青萍唾壺缺
雲霧朝披博羅頂
星斗夜摸空同峽
歸來笑擁綠衣女
盧橘楊梅照紅頰
朝雲已去學士還
瘴雨蠻烟護荒碣
精忠大節豈重覩
文藻風流頗頑頓
乾綱一振壬午歲
地闢天開走狐孽
徵書九道發燕邸
盡起龍干布朝列

是時沈郎奉明詔長嘯扁舟返西浙逡巡故國拜丘壠
問寢高堂痛離濶縣官日夜戒行李驛使交馳訊車轍
男兒肯作里中老直臣更樹臺端節同時吳趙艾與鄒
駉駉飛黃並騰踏沈郎詎得終岩穴天上仙查邈河漢
腰下刀環耀明月揚鞭再過五陵豪擊筑重招薊門俠
薊門樓殿花三十尚記公車抱長鋏對策明光亦草草
敝履短衣行蹶躅中原邂逅吾共爾白眼紅顏寸衷合
誦余連璧心已醉示我郊居思橫發蒼茫大雪華陽街

拂袖徐生館中別風塵傾蓋古則有宇宙論心近誰洽
即令汝燕余復越抗手胡能不悲咽沈伯子酌汝蒲萄
之美酒繫汝珊瑚之寶玦一言贈汝中自知此去中外
望掀揭兒童走卒盡道汝凜凜剛腸石與鐵腰金拖玉
寧汝事義膽忠肝豈虛設三公九列貴易保萬姓千秋
口難輟重華尚納大禹戒仲甫亦補周王闕朝多善政
祿可殫事有當言檻仍折風雲況遇大行日努力群龍
樹勲業竹帛旂常兩光絕一旦抽身蚤林樾丈夫出處

須偉烈嗚呼丈夫出處須偉烈異日儒生秉鈇鉞

長歌行送方翁恬遊武夷有序

方生翁恬祖太古以隱操著稱為詩歌不規
規繩墨而天趣自得吳歙間名士多與之游
生少即世其家業時時挾策及余門所為寄
贈推挹者甚至今秋得余白榆集讀之狂叫
擊楫立為跋數千言余彌愧其獎飾顧自生
昌艾之嗜發之余未嘗請也爰報以詩

方生堯治太古孫丘壑流風今尚存敝衣掣衿動見肘
負氣不肯干豪門自言知交遍海宇輸肝伏膽惟三人
新都汪伯玉興國吳明卿里中胡元瑞三子者令我寤
寐勞心魂丈夫壯志在不朽要令竹帛垂乾坤升堂入
室即先達眼底窮通安足論憶汝前年走興國雲夢瀟
湘眼雙碧吳郎跳梁空一世贈汝篇章朗奎壁憶汝去
年入新都司馬文名天下無如椽立草處士傳坐令氣
色高菰蒲兩公聲譽冠天下汝得璫璫重增價先生齏

齷齪楚囚汝何所見何所求方生大笑笑余嬾惟我與
公交不淺柴門相去十里強溪上時時達雞犬自君總
角才已聞我向何人不道君大蘇小陸長在口王後盧
前詎足云曹劉李杜亦男子見君敢謂秦無人君或未
知我我實深知君君也歌詩遍林樾恍揭大呂懸雲門
珠璣萬斛落謦欬世人疇不攀青雲胡為靳我無一字
如挾九鼎持千鈞即今便欲武夷去寸心耿耿當誰陳
秋風布袍寒徹骨願得片語迴陽春我聞生言亦大笑

過誠在我不在君不見杜陵贈端復文章有道交有神
家雞野鷺種種好大鵬斥鴳何疎親醉中狂筆歌贈汝
朱絃白日飛梁塵憶生年少氣橫發世世綸竿受家業
學書學劍三十年學得新詩動吳越青鞵半踏天竺雨
白紵全騎武林月我謂汝詩勝汝祖汝得余言欲起舞
先生片諾豈偶然立榜余名在今古高堂飈沓來寒風
繞夜芙蓉電光吐干將莫邪自有靈誰其拂拭華陰土
嗚呼窮鬼實伺人五畝經營生計阻連年旱魃滿山谷

赤日橫天跨平陸十家九家鬻嬰孺生也寧免妻兒哭
晝捫甌釜多游塵曉摸瓶罌絕餘粟床頭魍魎時揶揄
屋上鵯鷦多刺促任使喉端喙三尺不博車前薪一束
以茲欲作閩中遊幔亭峨峨天盡頭雲漱玉佩紛上界
鐵船丹竈懸中流一遇靈仙蛻凡骨脫棄妻子如蜉蝣
先生較汝窮更甚蹉跎四十談封侯老親稚子倏拋擲
一身宇宙如懸疣浮名雞肋果何用百年強半居窮愁
作歌贈汝慰汝意仰天長嘯風颭颭三山九曲曾尋汝

竹枝桂棹行夷猶武夷君兮倘相值挾汝爛醉金銀樓
病餘絕不作長歌生兩以書來堯治垂橐而遊閩惟藉
子大篇以重即子有辭於堯治其曷辭於武夷君噫余
懶慢自廢若青霞赤城兩地主步武間不聞問久矣况
武夷君庸暇以苛禮責余惟是生十載之勤缺焉久未
報也故歌以慰之
并寄詢武夷君焉

二酉山房歌有序

弇州王公既為余記二酉山房矣新都汪公
復為余作山房書目叙敬賦長歌奉酬凡千字
君不見崑崙高高閭風出其上下視扶桑弱水相去幾

千大傍開四百四十門日月東西互相望傳聞大酉小
酉雙名山迺在崑崙閬風二岳之中間帝遣藏書號羣
玉金庭石室森鈎連白虹璀璨映絳帙朱霞錯落垂瑯
函自從軒轅來宵絕殊人寰靈威丈人過縮足不敢前
成周穆滿驅八駿躡電乘風到靈境嵐深谷峭黯莫留
却攜王母升蓬丘祖龍炎威掃六合秦人留書閉空峽
至今玉洞開桃花仙源可望不可涉坑灰未冷漢社興
大兒中壘小子雲蓁然天祿下真宰爛漫七略羅天人

阮家居士重蒐錄蠹簡縱橫委胸腹湘東再火一不留
七萬瑤華燼荒麓聚書崛起開皇朝縹囊瑯笈摩丹霄
累累三十七萬卷嘉則之殿高岵堯諸儒讐校汰冗雜
正本亦止三萬饒開元八萬最奇絕往往玄珠出岩穴
宋時羣主競好文一日三詔何繽紛後來馬鄭諸子出
摩娑論列亦已勤好武遍中華馬上為生涯詩書匪故
習文具徒矜誇鴻荒重剖大明域九曜含輝聚東壁天
開地闢恢雄風霧湧潢流映朝日吾鄉文憲達最先高

文大冊揮如椽青蘿讀書四十載鑽研法藏窺重玄雲
間子淵嗜綴輯斷簡殘螢映牆壁成都用修雅好奇索
摸科斗成嗔痴南陽陳卿負綜博一生惟折五鹿角北
海馮君推殫精歌謠委屑煩經營突兀瑯琊起文苑力
挽頽風究墳典爾雅樓中四萬軸金石齋頭五千卷須
彌磅礴宛委深吐納宇宙橫古今張王陸沉驅左席何
因物色來蘭陰蘭陰胡生負書癖早逐劉郎卧岩石髻
年已絕軒冕好壯歲偏耽窮鬼力北走燕臺東走吳金

陵閩越窮江湖飢居寄廡錄餘燼負薪織履償追逋陸
則惠施水米芾昏黑忘眠晝忘食乍可休糧餓途路詎肯
空囊返鄉國二十四度羅山房二千四萬堆琳瑯黔婁
妻子困欲死君山篋笥富可量上距羲農下昭代觸手
牙籤宛相待聖神賢哲窮討謨帝伯皇王罄元會一榻
一几橫疎寮一琴一研祛煩囂焚香獨擁四部坐南面
王樂寧堪驕黎生八分稱好手夜宿山齋笑如斗縱觀
丘索盈前除大叫狂呼題二酉瑯琊作記當代傳姓名

已覩琬琰懸觸目傷心故交盡却尋司馬來新安司馬
心胸曠千古夙昔圖書探天府三墳二雅勤雕鏤一笈
五車勞綴補太函峨峨雲際開恍入東觀窺蘭臺衆中
誇我好玄者撈腸拄腹談天才寂寞螢窗守殘雪攬鏡
蒼茫見華髮聲華豈必專窮愁著述總知成滅裂側身
六合中自疑異代乾坤未堪說感公國士知肝腸為公
竭幔亭十日飲驅車復成別迴看二酉山峻嶒渺天末
崑崙閭風定何處弱水扶桑杳難越底似從公居太玉

副墨煌煌恣繙閱君不見太函五城十二樓金銀城闕
天盡頭陶公八翼不得上梯仙豈合凡人留孤帆且返
越江溪俛仰竹素聊優游異時四部讀已盡玄關或許
停蒼虬君不見蘭陰下激水流輪囷古木枝相繆瓊牖
繩樞閉荒逕華門蓬巷懸清秋夜夜紅光燭星斗兀兀
陳編柳生肘短缺長檠竟何有醢雞甕裡真自笑蠹魚
架上安足友竺乾本來一物無柱下青牛亦西走函中
領取五千言赤脚流沙尋二酉

少室山房集卷二十九

欽定四庫全書

少室山房集卷三十

明 胡應麟 撰

七言古詩四首

白榆歌別司馬汪公歸婺中有序

余入新都再閱月一蒯緱置旅店中而時時襟
被從諸酒人游于白岳為日五之一于豐于為
日三之一餘日則皆寓太函司馬公泊羣從傾

倒流連窮極勝賞即平原河朔詎能什一于茲
余瀕發復止數四咸以司馬公固要期修禊後
同過弇園申絮酒之酹既司馬以仲淹故改訂
暮秋余始前發公輕舫餞送百里執手惓惓且
撰記送余東歸纖悉如畫固知百世而下有聞
風躍然者媿亡以報稱大雅爰歷叙從公讌遊
始末為長歌千五百言先是公有詩招余入白
榆社余未及答篇首之興遂起白榆古歌行贍

縛極於駱氏諸篇今之曼衍殆且倍之要以具
載當時詞之冗劣弗暇計也

天上何所有歷歷種白榆光輝爛絳闕照灼青雲衢白
榆花開銀漢傍千枝萬葉垂琳瑯榦擁西池翳若木根
盤東旭凌扶桑何來太乙精騎龍遊八荒折花戲閭闔
竦身朝紫皇帝命攜青童下界聊徜徉時維乙酉歲元
會呈嘉祥長虹百道飛紫陽胃婁奎壁交寒芒巍然名
世降空谷九州四海垂文章文園消渴太史腐宇宙何

人策高步千秋再起司馬公鼎足中原共馳騫司馬當
年年甫髫食牛吞虎心雄豪試宰烏傷動當寧立驅五
馬行春郊最爾倭酋躡中國流血膏原痏橫隰九重拊
髀思長城大開幕府羅羣英餘皇亂蹴滄海上隻手盡
補天南傾偉哉司馬文且武左挈夔龍右方虎瑯琊兄
弟中頡頏一字憑陵鬪今古如椽大筆流風霆落迢迢
與元化并差肩檀孟走公穀揚班十輩無留行餘事為
詩歌格力尤矯絕宵馳厯下軍神交大梁俠稜增健骨

摩蒼霄炫如威鳳升宮堯有時掉臂浣花宅杜陵野夫
不得驕岳岳龍門並真宰却向溪頭問蘭茝憐才意氣
貫金石下士聲名亘湖海胡生雙刺懷十年姓名磨滅
甘塵烟參差一泛洞庭棹極目練水心茫然山陰昨夜
雪三丈立呼舴艋來新安新安山水何奇哉巨石林立
高崖摧奔流濺沫望不極恍若吕梁懸水三十仞廬山
之瀑灑瀕之流砰訇觸怒爭喧吼長年捩舵不遑息轉
入危灘勢逾急窮幽歷阻到梁下翹首天都倚絕壁天

都去天不盈尺雲門隱隱雲氣入兩袖乘天風蒼茫踏
雲中舉頭見太函疑是軒轅宮軒轅不肯謁却謁司馬
公公也倒屣出一笑心神融中厨餽豐膳魚鱉羞黃熊
玄談叩無始高論探鴻濛醉中吐豪氣四坐驚元龍不
知天河落盞底但見蓬萊旭日在苒懸城東城東陌上
春風來十里五里桃花開飄然藍輦捫崔嵬紅霞紛紛
落綠苔明眸皓齒臨高臺恍如瓢笠行天台吳生曼聲
振林木謝生懸河筭充腹美人臨叩得王四豪士扶風

見汪六曲江觀濤病色揚龍山落帽饒清狂山公倒著
接離坐相看一一俱高陽定麓博山焚妙香蒲萄之釀
琥珀光大叫酣眠竹林下下視六合天茫茫大白頻揮
不知數斗酒寧論百篇富文章乍可穹壤齊富貴真如
草頭露拂衣東望生離愁我欲東歸公苦留為君且解
青貂裘山靈入夢幽思發單車竟作齊雲遊齊雲巖嵒
天盡頭何年赤縣開神州蹊迴谷轉劃然一竅透混沌
香爐紫烟繚繞五城十二崑崙丘憇公無量閭宿公文

昌樓羽人跨白鹿道士騎青牛五老岩岩立霞際環珮
高翔隔塵世三姑亭亭若可招蕙裳羅帶長飄搖迴瞻
巨碣峙寥廓科斗蟲魚籀文剝云是元封封禪碑帝遣
神書鎮名岳朝辭白岳下暮宿岩市溪如花六七輩秉
燭相招攜華燈熒熒夾明月笳鼓煌煌衆星列忽看紫
氣屯關門走卒兒童競懽悅曳杖扶天孫徘徊登幔亭
周遭列岩岫綵繪飛銀屏觀者盈道傍嘆息難具陳有
如武夷君揮手辭世人幔亭登乍畢還尋上池室浮筏

泝空明揚帆弄春碧沙棠為楫繡幕懸金甌玉瓶置我
前百壺蕩漾如流泉翠睂蟬鬢紛嬋娟行樂奏雷電
作迴橈轉向濠梁泊清沙錦石儼可數細雨斜風亦不
惡李姬拂袖擁高浪趙女褰裙映林薄漫憶岑郎吟漢
陂欲效陳思賦河洛昏黑歸來興逾逸玳瑁芙蓉衆賓
集紅牙按拍催鸞笙紫箏攢簫和龍笛痛飲淋漓將至
石主人留髡向西席吁嗟乎今晨何晨夕何夕人生快
意差已極樂極悲來將奈何登山臨水哀情多倚風老

泪雙滂沱公為我楚舞我為公越歌豐城兩神物曾合
長蹉跎眼前歲月東逝波青青柳色明關河明發牽衣
强余住咫尺芳洲斷春樹欲行不行行且留未忍匆匆
別公去公不見瑯琊布衣十日飲瑯琊之人渺何處當
時太白配殘月此日中流僅孤柱何如片鷁飛嚴陵生
芻泂酌澆吳城白玉之樓縹緲孤懸大羅上弇州之山
五彩之鳥八翼四足仰天矯首而長鳴定知精爽為公
下輜輶雜沓來秋冥旁觀客有騎羊者彷彿生平共杯

葦如澠之酒迹已陳此臂寧堪少年把俯仰乾坤但公
在磊落肝腸爲公寫已從孔禰中末契底事桓文論興
謝願作靈光千萬年白首同公白榆社

題趙相國齋頭中天一柱圖

老幹凌空舞秋色大澤龍蛇聳千尺何年夸父移崑崙
撐拄東南半天碧畫師名姓聞國初郭熙遠裔留荆吳
平生畫松三百本此圖卓犖傳皇都丈八桑皮白雲翁
落墨含毫勢生動恍忽秦時大夫五其一飛來挂高棟

峻峻皴鬣橫崔嵬霜皮何止四十圍絕壁孤懸蔽岩岫
太空直上挈雲雷松下爲誰獨箕踞白眼科頭坐深樹
迴疑叔夜揮五絃目送飛鴻暮來去畢宏韋偃紛難儔
生枝秃析驚凡流笑殺杜陵褐衣破拮据絹素摹青虬
黃扉元老真柱石落落岩廊爲時出朝端祇服公旦勤
海內渾忘帝堯力念年懷山歸夢長一朝覩此神揚揚
縱橫麗句洒胸臆如椽巨筆垂琳瑯迴望蘭陰舊松逕
幾欲來風赴清陰疇當大厦庇寒饑孰向明堂佐神聖

踟躕且閱三萬秋
蟠桃歲歲紅丹丘
八蠻頓顙九土服
剡溪却泛鷁夷舟
峨嵋芙蓉亂峰紫
湧雪餐霞伴周史
無勞辟穀追前人
自是重來赤松子

趙侯汝申以學術興起一方
憐才下善闔邑推其長者
茲以七賢圖屬余賦之
倘亦有王阮忘年之意乎
敬題短歌

趙侯歟我城南屋堂上高懸畫一幅
是時六月涼飈生萬箇琅玕照新築
衣冠不類河朔豪船舫曾非剡溪曲

細看乃是晉諸賢醉倚長林美修竹疎枝的皜橫瀟湘
密葉瓏蔥卷淇澳珠簾粉閣坐相對盡日明窻看不足
彷彿當時六七公持螯白眼橫霜空脫巾露頂挂石壁
仰天大笑來清風匆匆與午事難說烟塵瀕洞盈寰中
此時不醉欲何事眼看浮世真虛空步兵晚樹嘯聲發
瀟仲清言宛如屑子期鼓鞀仍著書伶也攜壺更荷鍾
阮生撥阮嵇生絃目送飛鴻遊太玄就中山公最長者
百觚在手情頽然南陽趙侯世希有滿腹珠璣貫牛斗

偷桃偶墮方朔緣
謫向人間卧巖數
生平飲酒但數巡
座中賓客長千人
何人把贈周昉畫
躍然對我融心神
胡生晚得酒中趣
跋扈飛揚有深意
一朝覩此形貌親
恍若諸賢把余臂
爲君作歌還贈君
生綃落筆飛玄雲
何時買斷篋簞谷
共作林中避世人

偃卧俞公臨榻上戲題

俞郎一榻長安市
破衲蒙茸裹布被
狂來坦腹呼元龍
蹴蹋星辰動天地
華胥國小安足遊
君家赤烏雙琳球

大鵬希有儼相值飛行八極眠瓊樓

少室山房集卷三十

欽定四庫全書

少室山房集卷三十一

明 胡應麟 撰

五言律詩八十一首

西山十詠同陳沈二太史黎秘書楊祠部丘計
部李環衛朱光祿安茂才童康鄧朱四山人
作

晚至碧雲寺

梵剎金銀布花香繞碧欄斷崖交檜柏飛瀑洒琅玕霞
起天台暮雲生嶽麓寒鍾聲似迎客時出遠林端

香山寺飯初上人禪院

梵閣千尋起瑤壇一徑斜僧歸迷翠巘客至掃青霞竹
裡分香積松間轉法華遙看層砌上縹緲墮天花

玉泉

飛流望不極縹緲掛長川天際銀河落峰頭玉井蓮波
光迴太液雲氣引甘泉更上遺宮頂千林起夕烟

功德寺望景陵

宣皇游幸日千騎轉晴沙
殿繞驪山樹窻開綉嶺花
星辰留御輦雲霧鎖仙槎
北望龍蟠氣飄飄想翠華

登碧霞宮閣

檻立孤峰上窻開萬嶺西
霞光流紫極日影抱丹梯
綺樹三春長金芝五色齊
蓬萊宮殿裡笙鶴舊曾攜

玄貞觀

萬山蒼翠合流水晚瀟瀟
霧裡瑤臺出雲中絳節朝桃

花開絕澗松影落層霄時聽羣仙度天風引玉簫

秋日同諸子登望湖亭

殿隱芙蓉外亭開薜荔中山光寒帶雨湖色淨連空作
賦攜詞客行歌伴釣翁夕陽沙浦遠北雁起秋風

小憩圓通寺題

說法聞初地題名到上方砌幽松子落林遠葉聲長夜
雪飄山磬秋雲洒石牀坐來千嶂裡嵐翠滿衣裳

洪光寺聽真上人誦經作

地入空王宇山藏釋子筵白雲流五岳青壁俯諸天象
外烟花麗空中色界懸為將忘世念一誦法華篇

宿翠岩寺

晨風遙策杖夕露幾沾衣禮佛青山塔逢僧白石扉懸
蘿山鳥集亞竹水螢飛為愛西窻宿泉聲出翠微

仲秋同祝鳴臯諸文學再遊西山得詩四首

天壽山謁諸陵

紫殿衣冠肅玄宮劍璽遙天迴羣后集地迴百靈朝文

字垂義畫聲歌咽帝韶萬年沾洒處寒雨動青霄

湖上

積水湖天合泠泠帝闕西逶迤雲色淨掩映日華低鳳
吹臨高岸龍舟出大堤桃花源咫尺洞口夕聞雞

游玄真觀

積翠三天迴飛梁百尺橫星河浮玉砌雲霧攬金莖羽
客青泥飯仙人赤石英何年生羽翼塵外訪蓬瀛

攜尊翠微閣晚坐

振錫千林暮移尊片月秋不辭青嶂遠聊共白雲遊洗
鉢花臺靜懸燈竹逕幽朝來挈小朗乞食向牛頭

答李惟寅病中見寄

豈是趨朝懶風塵損壯顏閉門芳草合高枕白雲閑柳
色溪南棹鶯聲郭外山遙憐作賦客覓夢屢躋扳

題朱山人汝修卷

石磴烟雲起仙源費獨尋碧山玄晏宅滄海尚平心歲
月留斑管陽春抱玉琴幾年嵩洛思倏爾一開襟

丘謙之招遊崇善寺分得雲字

竹院名香起花臺積翠分
雙松寒挂雪一榻晚生雲
畫想滄洲迹經傳白馬文
平生許玄度何事戀人羣

康裕卿山人移居

燃桂生涯盡飛蓬旅迹多地偏
餘水石鄉遠隔關河
夜帳悲猿鶴春山怨薜蘿
蕭條剡溪宅風雪近誰過

送人還秣陵

獻書辭北闕仗劍出西京
落日滄江遠孤帆萬里征
烟

霞淮口寺風雨石頭城別後相思處關山候雁鳴

春日送人之劍南二首

大澤冰初解長途雪正晴孤帆送爾去千里獨含情竹
翳湘妃館花明蜀帝城當壚人好在不淺舊逢迎

蜀道難猶乍湘潭去若何青天浮灩澦白雪湧岷城宅
問揚雄隱堂攜杜甫過錦官城外路翠柏幾婆婆

送吳廣文之嶺南

寂寞青羶地何當事遠遊問人還劍浦尋雪上羅浮海

岸飛花盡蠻天落木愁粵臺時眺覽萬里見高秋

渡江望金陵宮闕四首

望望吳天迴遙遙越客來萬山京口立孤舶海門開蜃
喻風雷起龍吟日月迴鳳城回首處佳氣滿蓬萊

上國堪萍梗長江動旅愁天浮揚子樹日照廣陵舟駕
浪黿鼉語飛空蜃鱷遊五雲看咫尺臺殿擁神州

紺宇三山近皇畿萬堞遙雲藏佳麗國地拱聖明朝王
輦扶雙鳳金甌奠六鼇秦淮今夜月愁倚木蘭橈

搖落江天上秋風度李膺乘槎真汗漫擊楫豈飛騰紫
氣扶天闕明霞拱孝陵鍾山舊遊地夢繞白雲層

金山

兀立江心寺芙蓉萬古看孤峰留杖錫絕嶠鎖闌干碧
湧高天浪青浮大海瀾妙高臺上客日暮轉盤桓

焦山

何年雲霧裡卧此少微星地擁幽人宅天藏處士靈一
峰齊北固雙井象中冷向暮風濤起誰尋瘞鶴銘

夜同裕卿話舊

萬里相逢日那能不黯然移家當暮雪行乞傍寒烟賦
豈三都後心猶五岳前向來溪水曲頻繫子猷船

答文父見懷之作

不見江西客相望鬢欲絲十年滄海夢千里碧雲思寥
廓南華論飛揚左尉辭但令龍劍合那復問雄雌

紅雲塢

幾夜瑤臺上移來十畝春籠烟千樹密照水萬花新環

珮堪留阮衣冠不避秦扁舟如可再長此謝迷津

病中文父過訪兼攜近作見示二首

豈謂伊人至能令倦客狂千秋誰陸謝一逕且求羊夜色青藜短秋聲白苧長朝來還奏賦不擬步長楊

遙遙風雪裡對語欲忘眠爾擅遊梁賦余慙入洛年天浮鵲鵲影城繞鳳凰烟何限金莖色相期漢光前

聞大參滕公擢任嶺南有寄二首

鼓角炎荒外旌旗大海傍九霄懸寵渥萬里倚翱翔郡

古羅浮雪天空粵嶠霜祇因將雨露沾洒盡扶桑
五嶺看乘傳千峯引佩刀春隨南極迴雲擁太微高霧
鱣先移瘴漠鯨已息濤獨憐吳越士泪滿別時袍

送劉從事之成都

翩翩遊客旆去指蜀門斜夜宿巫山雨朝行劍閣霞古
碑丞相廟蔓草拾遺家駟路留題滿頻將寄海涯

寄沈山人嘉則二首

異代看黃綺明時更許巢乾坤長作客湖海半論交卧

憶鯤鵬起吟從蠓蚋嘲玄亭奇字遍吾夢亦衡茅

四海聞高適中林得阮咸岳雲依短屐山雪洒長鑱夢

斷真千里書空漫百玉何當明月夜一試剡溪帆

嚮計
借聞

嘉則以詩
寄余未獲

寄李本寧督學二首

自失華陽社長懷渭水濱傳聞秦博士猶借漢詞臣絃

誦千花色檐帷萬柳塵若過中壘宅藜火定誰親

聞道三秦使烟花夾道看天高捫太華日近倚長安散

吏趨經幄諸生侍講壇上林應有賦時寄五雲端

寄汪仲淹伯仲

二仲何為者翩翩鄴下流白雲裁楚服明月攬吳鉤並
握揚雄草長陪謝傅遊碧山空咫尺覓夢使人愁

寄汪獻子

自返金陵客何方定卜居七哀應著咏孤憤蚤成書卧
榻芙蓉在衡門薜荔餘碧雲懷望久一悵剡溪魚

過吳門不及訪弇州王公寄懷十首

屈指中原業誰登大將臺千秋王粲起一代子長來日
遠龍樓夢天留兔苑才吳閶雲霧裡相望首重回

逸駕開元上雄風正始鄰雲霄誰北斗天地此陽春作
賦三都客傳詩四海人未應雙劍老雷電起延津

諭蜀傳司馬還吳憶士龍萬峯吟薜荔一逕把芙蓉月
落干將倚雲飄太乙從異時成握手白眼坐高春

渺邈違芝宇風流憶草堂藍田聊卜築綠芷暫浮觴日
避長庚色天回大酉歲十年翹首地葭莢倍蒼蒼

虎觀才俱屈雞林望轉高千言無彩筆片諾有緇袍夢
隔蓬丘樹吟殘閨苑桃何年攜手遂相對咏離騷

曳杖辭三島投簪傍五湖九丘窮倚相片語失潛夫鶴
唳天門遠鵬搏海色孤近來秋興劇散髮卧菰蘆

日月回真想乾坤入夢遊曉風吳苑屐寒雨石湖舟匣
底雙龍卧毫端萬象愁亦知三選好咫尺負羊求

貝錦看如昨牛衣卧轉深洞庭寒濯足林屋遠論心落
日天邊氣浮雲海上吟吳王臺北望作者自如林

此日雲門笠平生漢殿冠一時誰把袂萬古獨登壇岳
色崆峒曉河流砥柱寒尚思燕北社風雨動長安

帝惜懸車蚤人看杖鉞雄青山鄖子國白雪楚王宮杜
甫名差著靈均曲未工峴臺遺跡在千古擅流風

寄張茂才

聞道安仁鬢秋風半欲華青囊猶隱市白恰屢移家竺
色三天雨湖光萬岫霞絕憐揮袂日相對武林花

贈顯上人

幾歲遊天姥經秋住越臺萬山靈隱錫斜日海門杯出
定逢花雨傳燈悟却灰何因偕爾去結宇卧飛來

送周少叅督餉還楚

萬舸通淮泗雙旌傍海涯籌邊王相國經世賈長沙
霧擁春臯珮雲停野廟花遙看下車日題詠遍章華

哭童山人子鳴二首

海岳誰高蹈丘園有獨醒下帷頭自白避俗眼長青日
慘延州碣風寒鄭圃靈夜臺人近遠徙倚少微星

石戶真高隱雲卿此後先一家猶紫閣萬恨已黃泉
禪岳無遺草歲山有太玄向來攜手地悽絕子期絃

寄戚總戎

聞道嫖姚將提兵大漠間旌旗行漢壁鼓吹出秦關
白日雙鵬下黃雲萬騎閑時同投筆更乘勝過天山

懷歐楨伯博士

藉甚中原譽浮沈異代蹤青衿聊宦轍絳帳自儒宗
冷日華陽筑高天漢殿鐘祇園春草外猶記昔相逢

送王山人遊秦中

斗酒山城暮東風悵別離
天青遊華日地紫入關時
博望千年苑昆明萬古池
平生飛動興合遣杖藜知

送張茂才北上

燈燈張公子乘輶意氣新
萬言看謁帝千里獨寧親
柳折長安暮花吟太液春
寄言關外吏能識棄繻人

夏日同諸子宴郭鴻臚池亭分韻得涼字

背日山堂午舍風石逕涼閒來松桂下各把芟荷觴地

稱南州隱天容北海狂坐深漁唱發白眼對滄浪

寄徐大叅

西署初迴轍南天復擁符飛芻傳九塞轉餉出三吳海
色搖冠珮江雲照舳艫不堪攜手夢明月洞庭孤

秋日送陳山人還江右賦得廬山瀑布水

萬丈廬山瀑經行照客衣晝看銀海立晴望玉虹飛激
浪迴丹壑分流出翠微憑誰喚匡續一酌共忘機

寄方山人

憶爾辭家久秋高客況增帆當鄱水挂屐遍楚山登夜
宿隨沙鳥朝吟伴岳僧九疑風雪外何處吊黃陵

送艾都閩督餉淮上

九邊芻輓急飛將豈辭勞獨坐黃龍舸長驅白鷺濤江
花明綉箴海日擁征袍橫槩風流在遙天佇彩毫

贈弘上人

昔事崔羅什今逢帛道猷存思馴象下漱齒毒龍愁衲
綻三天雪杯懸萬里流吳中四百寺煙雨遍曾遊

送天台二僧還西域

挂錫同霞嶠歸帆並海涯雲侵秦磧遠路轉蜀臺斜翠
竹空中相青蓮定裏花誰知雙大士持鉢渡流沙

奉寄王江州六首

絕勝匡廬郡分曹數歲年高牙三楚外巨舳九江前日
抱香爐上天齊瀑布懸東林秋咫尺一問遠公禪

榮戟開雄鎮旌旗列上游猿聲千嶂色雁影萬峰秋散
帙聊公事褰帷即勝遊祇應明月夜長嘯庾公樓

豈為干城駐能將一壑專郡僚攜白傅地主偕青蓮岳
色舍杯墮江流卧榻懸轉看牛斗近雙照莫耶前

極目登高處淹留漢大夫萬家南斗近千里北辰孤虎
豹分流徙魚龍夾岸呼可容王勃賦今古擅洪都

但覺官曹勝寧知吏牘饒白雲匡嶺樹紅日海門潮酒
送陶公醉詩酬謝客招那能望鄉日不過虎溪橋

飛動征西節分違薊北盟詞人空碣石才子覓江城綵
筆千秋價綈袍一代情向來揮手地忍憶去帆平

寄華亭吳少府

伊昔迴車日囊空但一錢
乞身三泖地垂泪五湖天
養鶴重開逕烹鱸獨扣舷
茂陵余亦病憶爾思茫然

題松

離離搖碧澗落落俯蒼郊
拔地虬龍偃中天鸛鶴巢
濤聲寒月上野色亂雲交
寂寞徂徠頂秦封只浪嘲

徐方伯子與將之江右過訪有贈二首

豈謂看山地能令結駟來
人非中散卧客是偉長才
把

袂淹蘿薜行觴藉草萊夜中占紫氣雲擁豫章臺
弭節過嚴瀨褰帷問楚臯北風千騎發南斗片鴻高撫
字聲先著登臨思獨豪萬年滕閣賦行矣待抽毫

送壽山人

飄然滄海客曾事紫陽君袖裡黃庭字囊中赤伏文
放舲三泖月攜杖九峯雲後夜華亭夢應同鶴唳聞

寄李季宣二首

益憶曾傾地檣移遠別年千花淮浦浪獨樹海門煙白

亭吳郎曲青娥楚客筵廣陵橋上月相望幾嬋娟
最憶真州夜臨歧解鵬鷺江風停去鷁海月伴離裝柳
謝君平曲花饒杜牧狂吳姬三百輩若箇擅平康



少室山房集卷三十一

欽定四庫全書

集部

少室山房集卷三十二
四

詳校官編修_臣 翟槐

侍讀_臣 孫球覆勘

總校官庶吉士_臣 何思鈞

校對官中書_臣 王鍾泰

謄錄監生_臣 畢所誨

欽定四庫全書

少室山房集卷三十二

明 胡應麟 撰

五言律詩七十七首

徐鉉部過訪不值二首

何因藂桂下駟馬
值仙郎日駐金珂
影星流玉劒光登
龍餘顧盼題鳳愧
行藏佇聽東山起
含香入建章

傳呼鸞掖吏來訪
鹿門樵曲徑俄雙
屐空山祇一瓢白

雲寒自倚紫氣暮誰招好去蓬萊殿千花待漢軺

遊橫山菴

白馬何年到名山敞梵筵壇空諸佛下洞古一僧禪鉢
與龍俱卧燈將虎並傳真如祇自得誰為問青蓮

寄陸太史敬承二首

濩落吾能返飛騰爾故頻自為三館客誰共五陵春白
日流金掌紅雲護玉宸故園芳草外曾否念垂綸

爾作承明客吾歸已判年花香驚掖底柳色鳳池前醉

任眠中秘閒仍草太玄燕姬無限好猶記琵琶絃

哭唐太常二首

乍輟金華講長投海岸簪中涓誰冀北太史竟周南
道黃泉啟關門紫氣舍平生攜手客泪盡百花潭

祇謂焚魚卧真成跨鶴遊千秋誰掛劍萬事已藏舟
夜壑星辰遠重泉日月愁獨將知己淚慟哭洒西州

送王大行使嶺外

迢遞雙旌色朝行大海東天垂鵬翼盡日照蜃樓空玉

節諸番衛金函萬國同歸來銅柱畔題賦尉陀宮

荅汪茂才

尺素天俱遠芳尊日斲同自懷和氏璧誰問楚王弓畫
卧蒼龍偃宵談白馬雄青雲太史在寧復念途窮

夏日同諸子登望衡亭作呈趙明府

劇興真飛動層臺半斗牛天空疑不夏地迴欲生秋峽
色雙龍抱山形萬馬留異時懷賦客吾豈仲宣儔

李生西遊久不得問因寄

西遊去何日念爾獨離羣履綻秦山雪筇飛蜀嶺雲鄉
心寒狄落客思夜鴻聞記取岷中事南歸報右軍

送趙太史之嶺南五首

一麾辭禁闕萬里赴長沙地入蠻王壘天浮漢使槎亂
山梅嶺樹絕徼夜郎花永夜羅浮頂誰同眺日華

賈傳章纔上王褒命已傳飛霜隨劍舄大海傍樓船客
夢梅花裡鄉謠桂酒前坐看公府暇白雪滿南天

獻納紆青瑣驅馳戀紫宸珠厓百蠻路銅柱九夷春郡

邑橫天起旌旗截海陳祗應宣室夜萬里召孤臣

豸服層霄下麟符夾道光萬峯行瘴色獨馬度炎荒暮
雪秦關擁春城粵海長轉將金掌露移酒向扶桑

暫輟蘭臺講言乘桂水撓牙旌馳絕域綉斧出中朝瘴
壓高涼晚山通大宛遙莫嫌文字癖干羽徧三苗

送何山人遊邊

悠然尊酒別秣馬問漁陽漢磧連天紫邊沙擁日黃列
營隨驃騎分險駐龍驤會挾金城策長纓請建章

送人還桐廬

不遠桐江路歸帆候月牽赤霞晨際海青壁午連天鳥
道從人問猿聲傍客懸釣臺千尺倚誰伴子陵眠

送人入蜀

客畏蠶叢路君仍駟馬過白波三峽滿青嶂九疑多絕
棧移旌節層臺夢綺羅海棠花眼爛漫倚高歌

秋晚靈隱寺小憩

咫尺東林寺欄干不厭凭萬山迴卓錫一水護傳燈梵

室偕龍樹經壇接惠能上方鐘磬發晚傍白雲登

送李逸人西遊

一騎西遊遠雙鴻北望饒雪深眠太白雲起問中條漢
磧名偏古秦碑字半銷已無婚嫁累何地不漁樵

方伯滕公由嶺南過訪不值二首

翩翩岩穴畔千騎遠從東劍履周方伯軒輜漢上公花
看薇省近竹訝草堂空萬古夷門道誰論意氣雄

小隊行春日華鑣問俗時孤亭留臯蓋萬戶擁朱旗氣

色函關繞星辰漢殿移未應題鳳字曾受子雲奇

壬午秋以家君命北上舟過嚴光先生祠戲作
不向長安去何人奏客星物情違偃蹇吾道寄飄零大
澤寒收釣高天暮放舲羊裘謁明主歸卧萬峯青

舟次攜李寄王承父山人

痴絕王摩詰何時出輞川迷花孤洞裡採藥亂峰前劇
飲留真態長齋斷俗緣虎頭新使者曾乞賣文錢

再遊焦山

尺地開龍象逢江浸畫圖排雲千寺立湧霧一亭孤疊
嶺藏鐘磬中峰過舳艫憑誰買山色把釣作潛夫

夜宿金山作

疊浪天浮玉中流地布金寺圍孤島面亭插萬波心日
候晨鐘出潮將夜梵沈妙高寒獨上風雨過龍吟

金陵襍詩二十首

宛洛飛龍地岐豐下鳳年河山西控蜀象緯北朝燕玉
殿凌霄出金城截海懸嵯峨帝京色萬古鎮江天

寶鼎成周奠靈符大夏開日當濠水上雲傍孝陵來百
辟瞻黃屋千靈扈絳臺時看青瑣客鳴玉鳳池迴
虎豹天都近魚龍地軸閒穿壕瓜步水鎖岸秣陵山上
苑明冠蓋新亭集珮環徘徊承露掌百尺暮雲間

帝闕三秋到人烟四望平城圍盤海氣市井雜江聲翠
管吳謳發牙樯越舶行未央宮萬戶恍忽見蓬瀛

禁苑花如織離宮樹作行虹橋懸太液鳳管集昭陽日
麗雕甍動雲穿碧檻藏翠華雙掩映猶記六龍翔

畫戟三千隊，調戈十二營。
貔貅嚴左翼，熊虎列前旌。
草木環滁動，蒹葭到海平。
越裳重譯至，何事問長纓。

樹色東華遠，鐘聲大內開。
紅雲長樂觀，紫霧柏梁臺。
帝座杳恩擁，僊城睥睨迴。
蔣山青不斷，百里掛崔嵬。

畫檻排空立，飛甍逐望低。
觀危鳩鵲度，臺古鳳凰棲。
海日千門上，江雲萬堞齊。
大堤楊柳色，彷彿舊烏啼。

巷陌連松桂，園亭翳薜蘿。
人家王謝舊，佛寺晉梁多。
北固晨鍾斷，西陵夜舶過。
紫騮渾欲住，無奈客愁何。

大道開平樂名姝傍狹斜黃鸝交坐柳白馬競穿花翠
箔通雲氣珠簾上月華畫梁雙燕子遙認莫愁家

玄武湖邊路西風載酒行中流葦蕩瀕疊島象昆明落
日喧沙雁迴風動石鯨樓船三十萬猶記漢皇營

勝絕南朝地淹留北上程石城看虎踞蕭寺聽雞鳴岫
鎖吳雲暗江飛蜀雪明詰朝關外路真作棄繻行

寂寞空三殿豪華記六朝齊梁頻禪代支許競招要隻
字神飛動千言思沈寥昔人吾倘遇玉塵向誰驕

傑閣憑虛上迴瞻帝闕西城開千巷陌剌湧萬招提靈
谷青松合鍾山碧樹齊朝來渡江去擊楫為聞雞

落日長干道青絲照玉壺碧桃雙繫馬綠柳半藏烏
落堪詞客飛揚問酒徒縱邀金谷侶長夜鬪擣菹

袞袞牛頭路青山極望同天開吳楚地寺鎖晉隋宮宿
霧縈窻白朝霞出戶紅異時飛錫到闡化大江東

句曲山中樹華陽洞口雲玉樓千地湧金鐸四天聞老
鶴傳丹訣乖龍護赤文五芝容客客采長揖大茅君

結綺誇前代臨春憶大家清歌傳寶瑟麗藻擲瑤華殿
倚千門月樓飄萬井霞即今商女恨悽絕後庭花

屈指前朝事悲涼舊跡存金甌長日月玉殿自朝昏野
雀棲朱桁啼烏過白門柳花香滿店愁絕送王孫

獻賦趨鸞掖題詩寄鳳臺自呼狂客飲誰問謫仙才步
憶金蓮下歌聽玉樹迴三山吾欲去萬仞卧蓬萊

歐水部招同張太學劉大理顧司勳夜集徐園

遲李臨淮不至同用心字二首

華館夜沈沈追隨愜素心珮環三署合燈火萬家深白
苧翻吳曲青萍動越吟征西期不至愁絕露華侵
名園仍北郭小徑入東林地憶先皇賜天迴上客吟當
尊荷芰色滿座薜蘿心冉冉長安月飛光下翠岑

區用孺以端研見貽索余一詩為報

邂逅羅浮客論心衛水傍紅絲勞把贈青玉爛生光偃
月窺芸案涵星動草堂輸他阿環麗捧立在昭陽

哭黎惟敬秘書四首

此日朱明洞誰同對濁醪宦途窮執戟人代絕抽毫雞
犬聞天路魚龍泣海濤傳家大令在忍覩鳳凰毛
驟得天涯訃真成地下遊羅浮殘月墮碣石斷虹留慘
淡青黎閣嵯峨白玉樓梅花一萬樹何處挂吳鉤

石室瑤華閔泉臺玉樹遙神遊今八極宦蹟舊三朝客
競傳中論人誰賦大招那堪潞河望風色暮蕭蕭

邂逅為玄日踟躕射策年飛觥挑葉下授簡竹林前調
已中華絕名應大海傳亂山銅柱外若箇是新阡

寄觀察金公

按部雙旌遠行邊一劍雄圖書觀魯殿謠頌采齊風泰
岱浮空紫蓬萊上日紅登臨時極目作賦許誰同

秋日湖莊八首

幽棲只數椽野水十家連靜室長生白閒亭獨草玄兼
葭湖北路禾黍郭西田理就滄浪曲吳歌日扣舷
湖濶疑青草原荒近赤松微名藏一壑大業寄千峰戶
牖嵐光滿階除露氣濃樓高纔十尺莫擬卧元龍

素髮垂垂近青陽去去多霜簷飄橡栗雨壁上藤蘿越
女紅蓮棹吳儂白苧歌翛然車馬絕曳杖步山阿
野色看逾近秋光澹欲無淒風迴大壑驟雨入平湖碧
樹通樵徑丹楓繫釣艫江東步兵後瀟灑見吾徒

六尺鴟夷舫蕭然繫短籬亂山明隔垞積雨暗空陂身
世鷗鷺老行藏雁鶩知五湖秋萬斛點綴著西施
大野黃雲熟平湖白露涼菰蘆環笠澤薜荔翳柴桑落
雁啼沙汭流螢度石房寒花綴籬落作意近重陽

窮巷迴車轍柴門盡日幽杜陵歌大厦玄德卧高樓地
許鳬鷺占天容鹿豕遊虞卿懶成癖點筆為春秋
此日遊仙夢當時結客情玉繩鳩鵲觀金鑰鳳凰城白
眼長安卧紅顏上國行十年湖海氣踈濶傍柴荆

送蕭司空之南都四首

劍履新南國旌旗舊朔方一麾移細柳萬舸靜扶桑虎
豹軍容肅麒麟帝眷長異時書太史寧復論平陽
燦爛熊車度逶迤鳳闕來戈鋌千堞列鹵簿百城開日

近司空座星移上將臺大廷推相國誰並鄭侯才

組練過吳會衣冠入漢宮日光搖畫戟霞色射彤弓
渤海三秋靜潢池四望空未應勞夢卜天意屬非熊

鼓吹出江臯前驅意氣豪射潮收萬弩橫海列千舸
日月瞻黃屋雲霞護錦袍秣陵花似綺爛漫待抽毫

贈趙茂才

言開綠蘿逕却訪赤松遊枕簟依山僻琴書入洞幽
姓名文苑客身世醉鄉侯莫羨侯芭業玄亭易白頭

李逸人西遊寄訊

一壑容高卧頻年賦遠遊卜居秦望頂長嘯越臺秋海
日低龍屨山風綻鹿裘錢塘潮漸長乍夜放扁舟

秋日題唐惟艮山房二首

郭外千峯色翛然墮草堂挂冠三逕蚤高枕一丘長夕
露團幽砌朝霞宿畫廊門添五楊柳何異在柴桑
結宇雙松下為園萬竹中壯年歌老驥長日送飛鴻露
浥琴絲潤星搖劍色雄看余五游畢絕頂卧空同

寄灌父

悵望西亭客沈吟北海筵
玉笙王屋頂珠履鄴臺前
桂樹先秋發藜燈入夜懸
異時雙鶴語歸問大羅天

懷鄧孺孝兼訊周山人

憶汝龍門過蒼茫鶴馭分
暮歸句曲洞晨謁大茆君
把釣吳江雪傳書越海雲
草堂人獨卧誰勒稚圭文

吳叔通以四詩見貽賦答

寂寞乾坤事歸來一敝裘
雲山成獨卧海岱見名流
壁

已三年抱珠仍萬里投白蘋洲上路曾試木蘭舟

何處懷同調飛書問獨醒乍迴雙眼白猶阻萬峰青慘
淡垂綸石樓遲載酒亭異時新論就能賞太玄經

病肺荒園外潛身大海傍青陽馳翰墨白雪照行葢一
水蘭苔近千岩薜荔長夜來星斗色明滅傍干將

夢寐延陵客風流故不羣千秋曾和雪片語欲凌雲柳
隔青絲笮花生白練裙浮家何日事來往雲溪雲

少室山房集卷三十二

欽定四庫全書

少室山房集卷三十三

明 胡應麟 撰

五言律詩七十八首

句曲道中奉懷王司馬先生寄訊八首

帝夢思良弼天書問老臣
彤弓分雨露赤舄上星辰
虎豹千營合熊羆百衛陳
何妨文武畧第一畫麒麟

夙世元戎業明時上將材
大開貔虎幕長嘯鳳凰臺
記

室班揚聚胡床陸謝陪昨宵江上笛飛盡帝城梅

鳳德元千仞熊飛自一時河山分玉帳日月繞牙旗錯
落霜毫動熒煌露布馳共知莘野出寧畏草堂移

數辭三教主聊作萬夫雄橫梁長江上揮毫大海東陰
徐非賦侶鮑庾豈文工晉宋齊梁業何人不下風

譚天曾帝問縮地舊仙才未論青牛出真成彩鳳來毫
端窮宇宙匣底閔風雷戲作梁陳句猶堪長玉臺

寂寞千秋事踟躕六代間新亭新日月舊館舊河山柳

色停車騎花香襍珮環吳姬年尚少勸客亦酡顏

豪華非昔日羅綺尚前朝俠少黃金勒名姝赤玉簫花
明新院髻柳學故宮腰今夜揚州月平分十二橋

石頭城外路光色度青驄說法尋支遁參禪叩懶融塔
花晴日映潭影暮天空擬逐三車去西方問大雄

渡江有懷秣陵舊游八首再寄王長公

六代風流地豪吟興未涯層臺花宿鳳故堞柳藏鴉海
日籠丹霧江天照綺霞春光何太蚤先到莫愁家

投閑滄海上閱勝大江濱老樹齊梁雪飛蓬楚蜀雲帝
城雙鳳下官路八驕分悵望前朝事含杯幾夕曛

金波憐舊句玉樹待新題夜宿尋高座春遊出大堤殘
僧留晉宋古佛辨隋齊明日樓船上誰同教水犀

由來佳麗地本是帝王州綠浪邀盧女青山抱蔣侯桃
花雙闕路柳色萬家樓揔道官如屐那知官是遊

幕府三千客轅門十萬兵登龍環海岱候騎半江城畫
甲飄雲氣珠簾上月明夜來清嘯發雙鶴下瑤京

玉洞留仙棹金陵問帝都
野花朱折雀霜樹白門烏
晏
寢團牙戟宵吟擊唾壺
能教奇偉客白首卧菰蘆

青鞋曾碧落彩仗乍丹霄
大雅追三代雄風掃六朝
帆
檣揚子驛鹵簿秣陵橋
但作文章客寧知武畧饒

柱下書堪著壺中術已傳
三花留堊寺一葦渡江天
浪
息滄溟外塵消大漠前
何須片石上辛苦勒燕然

病卧原口長公以詩見存
遂有起色賦謝四章
骨立乾坤外呻吟歲月過
片言迴大造孤榻起沈疴
驟

覺頭風愈寧論肺病多觀濤定何日飛棹廣陵波

病卧空搔首文成劇賞心乍迴燕客夢初理越人吟白
雪流空館青陽動絕琴片言千古在底事論飛沈

一札長千里悠然病目開詎知垂燼燭猶作復然灰趙
壁初還邸燕金任築臺朝來滄海上咫尺見蓬萊

無媒寧逐鹿有路任亡羊朗誦陳琳檄高懸杜甫章神
明開混沌鬼魅失膏肓獲落餘生在猶堪王夜郎

渡淮

拂曙淮堤上垂楊漸可攀霧濃孤客舫雲淺八公山不
作投珠去真成抱玉還十年牛馬走端合鬢毛斑

自嚴灘至新安途中紀興十首呈司馬汪公

四百灘頭路峯巒面面青路疑行絕棧灘似泊空舸平
地飛千瀑高天突萬星不因司馬在吾豈別玄亭

一灘高一丈灘盡到天都疊嶂雲飛動陰厓日有無辛
夷殘紫落躑躅亂紅敷獨少行雲廟分明入峽途

明發寒逾甚羊裘當錦袍爭風帆力猛破雪橈聲豪閭

谷迷紅樹懸厓露碧桃居然丘壑底不用武陵逃

懸水三千仞奔流落大川片帆危欲墮羣纜急爭先石
險時棲鵲峯高欲跼鳶茲遊信奇絕點筆漫成篇

樹色逶迤合山光次第來岸疑夸父坼厓似巨靈開蜀
客迷三峽閩人話七臺移舟傍鷗鷺此夕漫驚猜

嵯峨探虎穴窈窕入龍宮百丈飛湍下雙篙巨石中地
危真破冢天近欲乘風恰稱詩懷壯長歌萬慮空

密纜紛如織高檣望若攢怒濤翻絕壑飛浪疊層巒不

雨青天潤無風白日寒蒼松植何代百尺架巔岼

片石俱飛動千山競送迎地真遊黯淡天似入蓬瀛纜
東高崖度檣穿絕壁行誰呼謫仙至白日跨長鯨

白岳新遊快青谿舊迹存亂山衝虎過奇石象獅蹲賈
舶環楓社漁梁護葦門飛鴻渺天末消息信乾坤

十年懷命駕千里棹孤航大壑行嚴瀨飛流涉吕梁猿
孫晨作伴豺虎夜成行咫尺龍門在無勞嘆望洋

驚猿峽

不見啼猿樹孤峰劃翠屏峭逾捫太華危欲墮中冷鳥
道懸空濶龍潭伏杳冥笑他韓吏部勒石向山靈

伏虎岩

何年飛灩澦百尺挂崔嵬絕壁盤飛電高梁劃迅雷檣
危三老懼纜急萬人摧日暮雄心發狂歌興未迴

古意

鳴鞭白門道新柳正藏鴉七寶裝繁弱千金散狹斜飛
揚孟公座調笑季倫家夜夜雙龍氣腰間挂赤霞

東汪仲淹時以足疾居肇林去太函三十里

方丈維摩室翛然物外蹤花餘天女散果剽法王供白
日流禪榻青天落梵鐘何當問神足白眼對長松

贈片雲片雲者司馬公所命王姬名也

窈窕尊前態娉婷畫裡顏客疑遊洛水神似降巫山夜
月輝眉黛朝霞動鬢鬟不應撩宋玉名字落人間

仲嘉攜酌過箕臺四首末篇懷汪獻于

信步南岡上寒松一逕斜浮杯當柳色促席坐桃花古

殿明丹壑方塘漾彩霞紅粧晚成隊拾翠傍晴沙

步步春原色尋芳意自閒石枰疎竹裡金鐸亂松間一
壑停蒼佩千峯峙翠鬟平生雙屐在天濶任躋攀

遠天橫霽色箕踞坐莓苔竹露晨猶滴松風午漸來翠
微懸絕壑蒼靄覆平臺十日猶能客將無典綠醅

潦倒悲華髮追隨覽少年煖風抽麥日微雨拗花天遊
女矜環珮居民競管絃維揚好春色何地著絲鞭

士能齋頭阻雨仲淹興疾來會一律遲之

風雨催寒食殘花閉小樓丁香空結恨紅豆故生愁夢
隔青綾被春遲綠綺裘觀濤今起色遲汝萬峯頭

同盛山人壚頭話舊作

一騎吳關外悲歌脫畏途殘生餘海嶠萬死得江湖盆
底冤誰燭壚頭興未徂十年攜手泪相對濕菰蘆

春日司馬公同攜王姬入紫霞洞觀桃花時少
連太寧仲嘉仲淹並集司馬以桃花源美人
家為韻分得桃字

爛漫西郊外肩輿度碧桃春生武陵洞病起曲江濤

仲時

淹興疾來會

日彩搖紈扇天香襲錦袍絕崖仍獨上誰似謝

公豪

得花字

代王姬作

十里春山色芳菲亂水涯瑤池迷故蹟玉洞闢新葩野
豁千林霧川明萬樹霞不知劉阮輩何事到仙家

題老蚌生珠圖

幾夜驪龍頷偷攜徑寸遊蕪城雙月上合浦一星流影

似懸鮫室光疑發
蜃樓未須慚老蚌
照乘詫諸侯

汪參軍邀飲作

畫拱搖丹日
雕闌駐彩雲
榻延徐孺子
吟接鮑參軍
午饌行山蕨
春羹薦野芹
醉歸渾不解
蘿月漸紛紛

休寧道中四首

百里休寧道
肩輿度夕陽
川原明翠黛
闌闌紅粧玉
珮時相亞
金釵盡作行
何方犢車至
夾路爛生光

拂曙征人起
蒼雲抱郭流
落紅依小徑
深綠漲平洲
竹

色偏縈輦松陰直過樓天然對圖畫底事喚營丘

白墮家家釀黃梁處處春飛泉懸薜荔遠岫削芙蓉晚
日前村旂春烟隔寺鐘玄天看咫尺紫氣欲成龍

望望山疑近行行路轉遙依岡梅子熟夾路豆香飄翠
幙縈朱戶紅糒簇畫橋百錢猶挂杖爛醉在今宵

同汪士能入豐干路逢仲淹寄詩輿中口授用

原韻

冷然遺俗累曳杖到仙家布帽扳名岳荷衣弄太霞吾

寧驅白石君已飯丹砂縱有天台遇能如萼綠華

阿四既留谿南士能命更呼劉生佐酒亦以事

羈賦此嘲之

咫尺玄英宅朱絃試一彈中原留上駟蓬島隔飛鸞

劉生

名鸞酒壓茶蘼甕春遲苜蓿盤美人期不至惆悵月華殘

宜男堂為汪氏題

階前植瑤草芳色暮離離艷入三姬座香飛百子池冰

桃偕獻實玉樹並生枝旦夕佳男兆華堂事事宜

樂樓

何年碩人住結構傍蒹葭睨柱千山月推窗萬壑霞青
藜中壘閣綠綺少文家好著元龍卧翛然世慮遐

贈高深甫二首

最憶高常侍生平樂事饒千金求驪駒十院貯紅綃古
蹟留三代新聲和六朝湖頭明月滿無夜不吹簫

自慙逍遙理誰同汗漫遊異書中秘得名墨太清留夜
月漁陽鼓春山燕子樓六橋楊柳色無處避驂騑

夜集劉將軍卽席作示孫徐兩生

聊同珠履客共此歲華徂
潦倒青絲盒淹留白玉壺
寒風迴擊筑驟雨促呼盧
不道嫖姚貴猶能事博徒

讀季孝廉匡廬詩卷題

彭蠡揚帆近匡廬縱目長
高峰懸紫翠亂瀑洒青蒼
竹隱文殊座蓮空慧遠堂
攢眉何處客不遠是柴桑

輓趙別駕汝申四首

神武門前路何人復挂冠
華陽聞鶴馭澌水罷漁竿
冷

日黃金竈寥天白玉棺君看雞犬去已到赤城端
頻年嗟伏櫪此日嘆藏舟世閱傳中壘鄉閭問太丘朱
絃俄入夜素琴正逢秋好在蓬池頂題詩遍十洲

玉局留丹界琳宮寄碧霞漸荒陶令菊難覓邵侯瓜霧
裡三天舄雲中八月槎椒漿聊一奠隴樹亂棲鴉

遽然孤蝶寢忽到夜臺傍別墅聚青桂空齋翳白楊星
沈南極杳天入大羅長一尉何須恨修文正拜郎

蕭舍譽自楚中來訪留集二首

下榻仍松檜移尊更薜蘿
星當雄劍聚雲傍彩毫
多客計留天目鄉書問汨羅
五游他日遂相逐老岩阿
狂歌青桂下醉舞綠筠前
越絕書猶著湘纍賦已傳
風葭雲夢笛雪葦洞庭船
歸路飢甌近能無問太玄

訪張伯起煖閣小集夜同過幼于園

伐木懷同調連枝愜共吟
圍爐冬閣煖秉燭夜堂深
月倚孤城棹風交萬戶砧
龍唇絃絕久拂拭為知音

幼于園中聽歌

一徑蓬蒿入層臺面綠波客攜桑落酒人倚柘枝歌夕
露更衣墮晨星襍被過五湖花照眼蜚晚著漁蓑

贈錢將軍

屬國儒風遠輕車將畧長侍童青玉案前隊綠沈槍北
府晨開席南樓夜據床邵陵游獵處白馬映絲韁

題吳肇成清波碧玉圖

亭亭開素面裊裊出朱唇水畔疑西子波心似洛神浣
紗猶倚石移襪乍生塵那得相攜去馨香贈遠人

聞王問伯領解南都喜而有作

此夕庭階樹真成奕葉光
賦曾標五子名欲擅三王客
禮龍門下神交雁塔傍
百年兄弟好同日奏長楊

舟次攜李寄王承父山人

邂逅蘭溪約秋風望未涯
地違青雀舫天靳白鷗沙
虎阜看茶近烏程問酒遐
春來定尋汝酩酊萬桃花

承父約余

過溪上余道出攜李遂不及往寄此以訂後期

泊姑蘇寄吳文仲

寂寞寒山寺鐘聲只自聽高雲隨去鳥夜雪到空艸竹
色誰分座花香獨扣扃太湖峯七十歷歷傍愁青

訪曹子念戲贈

幽居仍薜荔雅興舊菰蘆一榻懸東海孤航領太湖鬚
髯疑大俠骨相異潛夫何事吳閭底頻年侶博徒

長干道中書事

時太學同人邀飲

金波鵲鵲下玉管鳳凰調晉帳延雙隄吳粧出二喬
枝頻度曲桃葉舊傳謠欲認相尋處城南十五橋

紫霧藏金屋丹霞間玉樓那能佳麗地不作狹斜遊江
女名無畏盧家字莫愁徐娘雖老去象管不停謳

過淮上讀貞烈沈氏實編作沈為侍御吳公妾

余丙子吳公所取士也

匪石心難轉如山諾竟酬餘生寧九地一死為千秋壯
節長淮遠貞魂大海留預看彤史筆燦爛照松楸

憶昔吳公賞真同賈傳看淒涼神武闕早挂惠文冠舊
事悲桃李高風想蕙蘭酬知萬行泪愧汝大江干

渡黃河

九曲黃河水奔流下夕陽蘆根漁網集樹杪客帆張
巨石撐淮浦高洪壓呂梁黃姑頻歲約擊楫上扶桑

宿良鄉

小市良鄉驛征人覓解鞍空林萬木落孤館一燈殘
旅色逢秋暮鄉心入夜闌那知百里外明日是長安

少室山房集卷三十三